

楊襄毅公本兵疏議

楊襄毅公本兵疏議卷之六

覆南畿印馬御史羅復條陳馬政疏

少保兼太子太保兵部尚書臣楊博等謹

題為遵

成法革時弊以脩舉馬政事車駕清吏司案呈奉本部送
兵科抄出巡按直隸監察御史羅復題奉

聖旨該部知道欽此欽遵抄出送司案呈到部看得巡按
直隸監察御史羅復條陳四事合就開立前件議擬
上請定奪嘉靖四十年正月二十四日題奉

聖旨是欽此

一平馬價以便輸納看得御史羅復所陳大率欲要
以後將江南江北馬匹通准折色每匹徵銀二十四
兩無非寬卹民隱之意但本色馬匹原係

祖宗舊制暫改折色不過補偏救弊之權似難輕為變更
合無斟酌所擬移咨都察院轉行御史羅復將南直
隸四十年以後備用馬匹原係本色者照舊解俵本
色暫改折色者每匹止徵銀二十四兩以為定規以
蘇民困

一寬馬額以還迯移看得御史羅復所陳大率謂准
安府屬十一州縣以水災倭患人戶消耗大半而養

馬解俵如前近又加以計馬餉軍之累驅民迯移詞甚激切合無斟酌所擬備咨都察院轉行御史羅復本部仍行南京太僕寺備查見在之民令其養馬解俵其餘迯戶種折暫行豁免候歸復之日悉仍其舊州縣正官三年之內招完流移方許陞遷至於軍餉事在彼中備行彼處巡撫衙門再行查議應否徑自回奏

一禁調撥以蕃孳息着得御史羅復所陳大率因南直隸種馬連年借與民兵騎征倒失數多急當禁革無非愛惜馬力之意合無依其所擬今後應天廬鳳

巡撫衙門不許調撥種馬如果倉卒有警准於偏僻州縣該年里甲馬匹內通融量撥仍要嚴禁州縣官不得將種馬私借走遞如違從重究治

一清場租以免拋荒看得御史羅復所陳大率欲將無為州程文四等所佃草場除去新增或量減三分之二和州加增銀七百四十餘兩即與除豁又查得該州平坦可耕荒地七十餘頃可得租銀二百八十有奇比之原租止減三百四十有奇其三十二年以後拖欠租銀姑照舊額責限完納中間辯析甚為踴切况節經撫按衙門丈量的實無容別議合無依

所擬備行各該撫按官將前項草場應納應豁租銀
查處停當備造文冊徑自會奏

覆巡撫南贛都御史范欽報功行勘疏

題為募兵殄亂事職方清吏司案呈奉本部送兵科抄
出巡撫南贛汀漳等處地方提督軍務都察院右副
都御史范欽題奉

聖旨兵部知道欽此欽遵抄出送司案呈到部看得巡撫
南贛汀漳都御史范欽題稱募兵殄亂始自劫掠福
建閩清縣庫并沿途鄉村肆行流劫又突入江西新
城等縣敵殺官兵虜掠人財流毒地方今已拿獲賊

首馮天爵梁寬各該凌遲處死賊從馮勝等六十五
名各該強盜得財斬罪仍該照例梟示及稱南韶兵
備副使賀鏐勞宜嘉錄韶州知府張景遠通判王授
推官陸經南雄知府章接等功亦可尚各一節為照
前項劇賊起自福建延及江西彼時巡按御史鄭本
立止叅福建巡撫劉燾江西巡撫張元冲並未言及
南贛巡撫不知地方與南贛有無相干若地方相干
則今日之功止當贖其罪若地方無干則今日之功
寔當懋其賞且馮天爵馮勝等均係重刑賀鏐等亦
下激勸未經勘明輒難輕為議擬合候

今下移咨都察院轉行彼處巡按御史備查馮天爵馮
等是否真正強賊應否處決梟示范欽并賀鏞等或
先罪後功或有功無罪即今應該作何處分文書到
日限一月以裏從實具奏以憑覆請定奪嘉靖四十
年正月二十八日題奉

旨是欽此

覆宣大總督都御史李文進條陳邊計疏

題為遵

初諭竭愚忠經略邊備以圖安攘事職方清吏司案呈奉
本部送兵科抄出總督宣大山西等處地方軍務兼

理糧餉都察院右副都御史李文進題奉

聖旨該部知道欽此欽遵抄出送司案呈到部看得總督
宣大山西軍務右副都御史李文進條陳六事均切
邊計相應逐一議擬上請定奪嘉靖四十年二月十
八日題奉

聖旨依擬行欽此

一申明大計以伐虜謀看得搗巢之法大率有二其
一則覘虜醜之入急搗其巢以牽其內顧其一則乘
虜馬之弱分搗其巢以制其不及邇來邊臣徃徃行
之未嘗遙制即如近日大同豐州之捷是已但恐計

慮不周輕舉妄動匪徒無益而反害之合無通行九邊總督鎮巡等官急應李文進所議相機進止以伸撻伐之威以收全勝之略方為上策

一同心經略以圖安攘者得事不同心則功用弗奏况於軍旅之事尤其大者總兵巡撫受總督節制

勅諭甚明往年撫臣一抗軍門即蒙

聖明拿問紀綱所在不容毫髮僭差合無悉如李文進所議通行九邊以後敢有互相齟齬者聽各該總督官指名叅奏

一內外應援以分虜勢看得

朝廷設立總督兼統三鎮一應兵馬調度均係閩外之青聽其指揮者則當旌薦違其節制者則當論劾職守所在難以假借合無悉如李文進所議從實舉行不得遲回觀望自誤機宜

一廣練兵車以便追逐看得兵車之制居則以為營衛戰則以備衝突委為長技近日大同教練既稱有效合無通行三鎮巡撫都御史悉照李文進所議行令各路叅將等官各將步兵着實如法訓練務令諸藝俱精不拘多寡各為一營量給火器防守本路不許諸營選調各該撫臣各將練過步兵限五月以裏

徑自回奏

一勤練騎兵以振威武有得兵以訓練而精三鎮
兵操演無法積廢日久委非安內攘外之計今無過
行三鎮鎮巡等官悉照李文進所議從實簡練務臻
實效其大同演武教場遷移鎮城之北不知果否相
應行移鎮巡官再行踏勘徑自修舉

一慎固南山以嚴封守看得南山一帶地接

陵京委為要地合無備行薊鎮鎮巡官查照李文進所議
申飭各該將領加謹防禦南山內垣如果應該修繕
即便會同巡關御史勘議修築其官府聯墩墻垣原

奉 欽依節年脩舉緣何停寢并宣府全鎮外護防一應事宜悉聽總督官作速開坐具奏

遵 諭戒備兵火疏

題為欽奉

聖諭事職方清吏司案呈奉本部送嘉靖四十年二月十九日寅刻該 內閣傳示

聖諭今日之風占謂兵火似不可常者轉諭傳示諸內職凶賊外嚴邊備欽此欽遵抄捧到部送司案呈到部臣等仰惟

皇上偶因風異特注 宸衷既軫內究復念外孽申飭臣

等以安攘之事臣等捧讀 綸音不勝感仰即目內
地雖稱荒歉荷蒙

天恩救饑卹窮輕徭薄賦不止京城內外其次河東西大
江南北俱各宴然無警惟是外之邊備自正月以來
在薊鎮則節據薊遼總督尚書許論傳報虜酋把都
兒辛愛糾合東虜土蠻欲犯古北口大水峪等處已
該臣等嚴行許論徵調主客兵馬見今分壻拒守咨
行戶部處發銀十萬兩以為糧餉之費虜知有備遲
回白草川一帶尚在窺伺未見發作在大同則節據
總督都御史李文進傳報虜酋俺荅已自西海東還

住牧豐州聲言欲犯左衛右衛地方臣等先亦屢行李文進選調官軍相機戰守本部處發馬價戶部議發軍餉又行大同巡撫楊選將右衛廢閑將官尚表等坐委分守城池撫戢黎庶一切先防之事不敢不盡除遵奉

聖諭通行京城巡捕及腹裏巡撫兵備等官并各邊督撫總兵等官各將兵火事宜仍嚴加戒備務保無虞外
伏望

皇上少紓 聖懷臣等下情無任懇切祈望之至嘉靖四十年二月十九日題奉

聖旨是欽此

遵諭申飭邊備疏

題為傳奉

聖諭事該本部題職方清吏司案呈奉本部送嘉靖四十年二月二十七日所刻該內閣傳奉

聖諭今日又大風止及旬日不可不為慮昨兵部回云各邊皆備無足為念恐未宜如是言欽此欽遵傳奉送司案呈到部臣等仰惟

聖皇在上軫念邊服時勤宵旰頃因風變異常旬日之間兩勤天語神謀遠慮即始見終無不曲盡臣等愚

昧敢不仰承竊見今之夷情迥異往往背往歲春三三
月草枯馬弱止能淺入不能深入止能小舉不能大
舉乃今一變其局往往乘春入犯薊州右衛尤為特
甚蓋古北與虜一墻僅隔右衛與虜三面為隣前蒙
聖諭已該臣等不次移文程督邊臣大小邊臣佩服

綸音早夜經營自不容緩節據薊遼總督尚書許論報稱
黃台吉頭目大同通漢謀犯古北台吉之婦孥只謂
我邊知覺追取大通大通不從奪其戰馬四匹方始
罷歸近日又屬夷五百撥甲扣關乞討月賞臣料此
賊敢為狂悖必有大兵徐出其後或以此牽制我兵

別由大水峪石塘嶺間道而來亦未可知已經備咨
許論令其東自山海西至居庸處處為備毋墮虜計
又據宣大總督都御史李文進條列戰守事宜及請
糧請馬易置將領練習兵車等疏先後議覆俱奉

俞旨其餘事在瑣屑臣等隨事與之往來咨議不敢一一
仰瀆

天聽但猶虜之患每出於不測制勝之兵當謹於未戰備
而又備方保萬全誠如

聖諭除再行各邊總督鎮巡兵備等官仰體

宸衷加意嚴備外臣等無任惶悚屏營之至嘉靖四十年

二月二十八日題奉

聖旨是欽此

覆叅賚機務尚書江東議定營務職守疏

題為遵照舊制舉行會議以脩戎務以圖永安事職方
清吏司案呈奉本部送兵科抄出叅賚機務太子少
保南京兵部尚書江東等題奉

聖旨該部知道欽此欽遵抄出送司案呈到部看得叅賚
機務南京兵部尚書江東等條列八事在坐營把衛
隊總官員則議稱脩飭營務持身無議者獎薦陞擢
廢弛職業不行改圖者戒効叅問在各營軍士則議

稱起操入營不得作樂喧嘩錯亂不到操畢不許離
伍攙隊飲酒肆擾如有故違查照懲治乞要議行遵
守一節為照南本備戎之事固在兵將約束兵將之
要全在紀綱今據該部所陳大率首欲將領修職以
服人心次欲軍士守法以明

國憲議論俱已明切以臣等愚見內外守備諸臣叶恭
同寅以端正本尤為先務相應通行議擬合候

命下本部移咨南京兵部會同內外守備叅贊等官務要
謀斷相資可否相濟仍仰遵

聖諭共成忠義之風以後但有違拘者應以軍法究治徑

楊選題奉
自究治應以參奏指名參奏不得玩愒縱容以貽後
患嘉靖四十年三月初一日題奉

聖旨是欽此

覆巡撫大同都御史楊選條陳邊計疏

題為據愚忠乞

聖鑒以圖勦立後效事職方清吏司案呈奉本部送兵科
抄出巡撫大同地方督理軍務都察院右僉都御史
楊選題奉

聖旨該部知道欽此抄出送司案呈到部看得巡撫大同
都御史楊選條陳四事均切邊計合就議擬上請定

奪嘉靖四十年三月初二日題奉

聖旨依擬行欽此

一固脩築以衛生靈看得堅壁清野守邊要務其在
大同尤為喫緊蓋川原平衍既不能遏虜之入兵馬
凋殘又無以挫虜之銳必須城堡高堅壕塹闊厚方
收保障之利本官所奏允為實政合無備行宣大山
西總督巡撫等官乘此春融即將三鎮應修城堡壕
塹應用錢糧器械及一切事宜速為修舉至于乘隙
血戰以挫其鋒分責守堡以定其賞悉如原議徑自
施行及照築堡不如築墩堡之費多大而難守墩之

本朝... 卷二
費少小而易成臣博往年巡撫甘肅嘗一行之頗收
成效若干各堡之內將四面角墩增築高厚虜勢雖
重併力守墩似亦不能遽克

一察人言以堅謀議看得兵以詭道制勝自古皆然
近來禦虜多循舊套不敢展布間有一二舉動異常
物議輒興是以人懷顧忌灰志士之心長狂虜之氣
所關非淺合無悉如本官所議今後該鎮事宜或戰
或守用奇用間俱聽從長處置務中機宜果能建立
奇勲聽臣等指實奏請優加恩典

一議久任以期成務看得官必久任政方有成願久

任之說節經建議方行即寢蓋以窮邊絕塞烽火驚
心速化之圖賢者不免本官既欲脩舉邊防各該文
武官員自當協力共濟難拘常調除大小將領不敢
輕動外合無移咨吏部將朔州左衛兩兵備守巡冀
北二道藩臬并沿邊有司等官各令久任資序應遷
并有功等項悉照所擬加俸加級毋輕陞調中間若
有志向灰頽甘心苞苴者亦聽撫按官不時叅治

一慎調用以圖真材者得人材難得軍旅之才尤為
難得即今大同地方千瘡百孔所賴分理安攘者全
在將領有司苟非諳練于平時豈能應變于臨事除

醜虜圍城軍民顛沛之時乃能捐財救急義可嘉尚
所借之數應合照數補還但恐貴部先曾處給未
重銜擬合查處為此合咨前去煩將前項銀兩如未
議處咨回本部題補如已經處補希由咨示等因咨
部送司卷查嘉靖三十七年十月該通政使司連狀
送據大同右玉林二衛舍餘馮瑤等告為大虜又因
邊城官軍缺乏月糧勸借富戶銀粟充筭月糧等事
本部備咨宣大總督軍門議給去後嘉靖三十八年
十月又該通政使司連狀送據馮瑤等告為乞討勸
借銀粟累告議准未足再乞明示事內稱瑤等具狀

告行兵部移咨總督巡撫衙門轉行兵備道議明詳
允已領銀一千四兩段二百五十疋共作銀二千四
兩之數行本城守備馮詔照數給散尚欠前銀七千
餘兩仍咨宣大軍門酌量處給去後今准前因案呈
到部看得前項銀兩比因虜攻右衛之時勸借富民
之有餘周濟貧丁之不足本為善政若使不為處給
以後地方有事信義已失斗粟粒米誰肯甘心輸之
所惜者小所失者大臣博往在彼中深知其詳相應
急為議處合候

命下將本部近日發去右衛買馬銀內准動一萬兩聽巡

撫都御史楊選扣筭明白作速補還取領附卷剩銀
并不堪改足俱送總督軍門賞功支用嘉靖四十年
三月十五日題奉

聖上是欽此

覆左給事中魏元吉責成參贊尚書江東禁戢營
兵疏

題為敷陳時政急務以裨

聖治事職方清吏司案呈奉本部送戶科抄出刑科左給
事中魏元吉題奉

聖旨該部看了來說欽此欽遵抄出送司卷查先該南京

兵部尚書江東等題為議併營伍事內稱議將南京振武營兵分隸各營乞要會同南京府部九卿大臣科道等官詳議具奏已該本部覆議題奉

欽依備行會同計議去後今該前因查呈到部看得刑科左給事中魏元吉具題前因大率謂南京振武營軍士縱肆日甚副總兵劉顯堪任都督該營軍士似應分散欲行尚書江東殫竭謀猷以壓衆心以消顯患及稱地方災傷養馬之役暫且停止及秋再議徵解各一節為照 國家撫馭軍士不過恩威兩端時給月糧歲給布花有功則照例陞賞死事則從重卹錄

無非字之以仁使之不忍欺怠惰則小懲玩肆則大
誠作奸犯科則改調遐荒無將不道則立置大辟無
非蔽之以義使之不敢欺勢本相湏理難偏廢所據
南京振武營軍士自去歲變後在戶部則糧賞及時
全無逢減在兵部則差操有期極其寬平正當效義
奮忠同報 皇恩乃敢恃頑負免自干

天憲今據言官所論或於對部而射箭或於職官而細罵
或搶掠於大都或劫奪於村市或創立百傑之會或
妄張無名之帖履霜堅冰漸不可長但中間守法之
人十尚八九首當分別不可混玉為石其餘冥行妄

作固為可惡若使追其既往又非與之更始之義係
干綱紀相應通行議擬伏望

皇上天語丁寧江東務要仰思 朝廷簡任之隆下盡臣
子勤瘁之義會同內外守備官殫竭忠猷申明法紀
軍之善者則反覆教詔令其益思向上軍之惡者則
懇切戒諭令其各知自新以後但有不法輕則以軍
法究治重則調發邊衛或收肆悖逆即便拿送法司
問置重典既不許輕舉妄動以失人心亦不許沽忍
養禍以壞政體文書到日限三箇月以裏聽南京科
道官將江東等振飭過緣由從實奏聞若仍前玩愒

亦聽科道官會本劾其都督徐珏改任南京右軍
都督府僉書以補李光榮之缺徐珏之缺應不代以
劉顯容臣等另行開奏至於振武營應散應留仍行
江東查照先今事理會議上請其北直隸山東河南
地方委果災傷備用馬匹通行各該巡撫都御史斟
酌輕重徑自議處嘉靖四十年三月二十二日題奉
聖旨是江東受朕簡任不能宣布朝廷恩威訓以忠義却
乃專事姑息以致營軍仍前悖肆便着會同守備等官
申明法紀嚴加禁治再似這等不宥徐珏依擬改用欽
此

覆都給事中王鶴等論遼東鎮巡官楊照侯汝諒
互相訐奏革任聽勘疏

題為鎮巡重臣不諳大體懷私忿爭懇乞

聖明早賜議處以安邊鎮事職方清吏司案呈奉本部送
兵科抄出兵科都給事中王鶴等題奉

聖旨該部知道欽此欽遵抄出送司查得先該征虜前將
軍鎮守遼東總兵官楊照奏為撫臣驕縱懷挾私讐
害辱執拘恐誤地方懇乞

天恩罷臣職守以快衆憤以安重鎮事奉

聖旨該部知道欽此又該巡撫遼東地方兼贊理軍務都

察院右僉都御史侯汝諒題為姦惡將官假故辭難
大肆欺罔裝誣撫臣懇乞

天恩俯賜懲究以肅紀綱以戒將來事奉

聖旨該部知道欽此通抄送司案呈到部看得兵科都給
事中王鶴等奏稱遼東總兵官楊照勇略未聞而輕
佻有徵譎詐叵測而規避日甚實非大將之材巡撫
都御史侯汝諒執守有餘而通變不足志向雖勤而
才力未逮亦忝重臣之任二人嫌疑已深構隙日久
終不能改心易慮共竭忠赤乞要行令回籍聽勘彼
此訐奏事情聽彼處巡按御史逐一查明徑自奏請

各一節為照遼東地方自嘉靖三十七年以來屢屢
失事小者姑未暇論重且大者多至二十餘次中間
如陣亡遊擊賈克備禦韓懋功殺死進貢夷人都督
八名搶去

勅書十道事干 國體鎮巡重臣一籌不展百務盡隳正
當洗心滌慮以蓋前愆不宜挾詐懷私自干清議所
據總兵官楊照明知罪狀之多欲行規避故為訐奏
之舉妄肆譏張都御史侯汝諒徒能持已不善處人
禍孽雖非自作辯析亦失大體交口汗澱其論未定
覲顏猜忌共事為難况人臣之義職在封疆當以身

許國若使見害則避見利則趨甚不容於

聖明之世既經該科叅論前來委為有見相應通行議擬

合候

命將楊照侯汝諒先行革任回籍聽勘遺下員缺各另
會官推補一而備咨都察院轉行遼東巡按御史將
各所奏事情逐一查勘務見是非明白就將失事情
罪計其任事年月何項罪在總兵何項罪在巡撫一
併分別從重叅究不許故持兩可蠹壞法紀其楊照
侯汝諒亦要杜門省各以待勘覆如敢再行奏擾容
臣等叅奏拿問仍乞

天語叮嚀各邊鎮巡等官以後務要同寅協恭仰報
國恩如有不諳大體私相攻訐者通聽該科并巡按御
史指名叅劾嘉靖四十年四月初二日題奉

聖旨是楊照侯汝諒都革任回籍聽勘員缺即推補欽此
覆宣大總督都御史李文進等會議邊防疏

題為傳奉

聖諭經理要防以備不虞事職方清史司案呈奉本部送
兵科抄出總督宣大山西等處地方軍務兼理糧餉
都察院右副都御史李文進巡撫宣府等處地方贊
理軍務都察院右僉都御史遲鳳翔題俱奉

聖旨該部知道欽此欽遵抄出送司案呈到部看得總督
宣大山西軍務右副都御史李文進等條陳四事俱
於邊計有益但南山一帶外則防禦之責在於宣鎮
內則防禦之責在於薊鎮一切修築事宜必須兩鎮
計議相同方免彼此推調之患伏乞

皇上勅下總督尚書許論等都御史李文進等查照款內
事理會於境上面相商確作速具奏定奪嘉靖四十
年四月初二日題奉

聖旨依擬行欽此

一南山一帶看得南山一帶拱衛畿輔委為第一重

地墩臺添築不妨嚴密如各官所議行令宣府鎮巡官趁今春暖及時修舉務堪保障合用銀兩查照舊例以十分為率本部於馬價內出銀二分半戶部出銀七分半各差官解赴該鎮應用至於款內薊鎮應脩墻墩仍聽許論李文進會勘具奏

一聯墩之設看得聯墩之設總督許論向在宣大軍門固嘗經始建置利害知之必真兩墩之間應否添築墻垣并未盡事宜合行許論會同李文進作速具奏其應用南鈔本部移咨工部除年例之外多為處發差官解赴宣鎮打造

一懷來平川看得防邊禦虜全在將領得人所據各官具奏前因隨材器使委為有見合無依其所擬將宋蘭改宣府東路叅將李世忠仍以遊擊職銜管理兵車董一奎以叅將職銜管練遊兵本部備查原擬責任各請 勅一道令其欽遵行事合用

查驗旗牌照例就被交代其奏討馬匹於太僕寺寄養馬內量給一千匹差官解赴該鎮免給各軍騎征

一永寧縣看得永寧地方最當衝險必須城垣堅固防守得人方保無虞除知縣移咨吏部查議外所據該城坍塌處所行令叅守等官上緊修砌完固未運

銀八千兩行移該部作速查發至於欲將榆林驛調
入公道等項事宜斟酌量充當令無悉如所議施行

議單本襲替武官雙月類題疏

題為武官襲替事武選清吏司案呈照得武官襲替優
給各該都司衛所保送兒男到部每雙月一選內有
犯該充軍為民降級調衛立功陣亡傳乞緝捕陞廕
功陞未任棄小就大借職退還武舉納級推陞派官
等項俱該大選後阜本具題每次不下五六十疏參
差不齊煩瀆

聖聽殊非政體呈乞酌處案呈到部看得前項阜本襲替

官舍雖係舊規但人各一疏仰煩宸斷委非慎重
皇言之意既經該司具呈前來相應議擬合候

命下以後應該單本官舍俟大選畢於次月初十日備將
各父祖緊關情節開款類總具題庶為長便嘉靖四
十年四月十五日題奉

聖旨是欽此

覆勘遼總督尚書許論議宣府聯墩不當棄疏
題為傳奉

聖諭經理要防以備不虞事職方清吏司案呈奉本部選
兵科抄出總督薊遼保定等處軍務兼理糧餉太子

太保兵部尚書兼都察院左副都御史許論題奉

聖旨兵部看議來說欽此欽遵抄出送司案呈到部看得
宣府昌平二鎮相為唇齒在宣府則整飭山北以為
外門在昌平則整飭山南以為內戶比之古北石塘
與虜止隔一墻者形勢不同近該本部題奉

欽依欲令兩鎮總督面會境上無非一家計筭之意但今
秋防漸近議論未一彼此耽延未免反致誤事至於
聯墩之不可棄非惟許論知之甚詳言之甚切臣博
向在彼中寔深知之廢強半之工失萬全之險律以
天時地利之義均為有碍相應通行議擬合候

命下移咨宣府總督巡撫官李文進等先將聯墩查照原
設舊制亟為修補守軍處給行糧火器專官較閱等
項以次舉行如果財力不敷應該作何處分徑自具
奏其山南山北脩守事宜兩鎮各自為計不必面會
以後如有踈漏聽臣等查察究治嘉靖四十年五月
十四日題奉

聖旨是欽此

覆雲南巡按御史王大任查處土夷阿堂遺孽疏
題為土人計殺賊首懇乞

聖明早賜議處地方以安人心事職方清吏司案呈奉本

部送兵科抄出巡按雲南監察御史王大任題奉

聖旨兵部知道欽此欽遵抄出送司案呈到部看得巡按

御史王大任題稱東川土夷阿堂刺死伊男獻出及

稱地方殘傷該府印信三顆俱被土官私分缺官管

束乞要查追安萬銓陰據東川實跡府印下落及委

官招撫殘傷人民查訪祿氏宗枝襲職守備仇爵擅

給銀兩提審者阿易等有無收領及阿堂男阿哲作

何安置一併查議一節為照土酋阿堂情雖報復私

讐跡已干犯公法始而勦之有名實是過舉終而處

之失當遂至罔功既稱被人用計刺死足為地方之

慶但印信給付未明事涉隱禍錢糧開報太濫理難
遽從既該巡按御史王大任具題前來相應通行議
擬合候

命下本部移咨總督川貴侍郎黃光昇并各該撫按等官
嚴查宣慰安萬銓有無希圖東川情節該府印信見
在何處經歷司照磨所印信緣何擅自私分務見下
落四川撫按官一面會委文武職官親詣東川將殘
傷人民多方招撫一面訪取土人素所推服祿氏宗
枝一人保勘明白承襲祖職并提審者阿易等曾否
收受守備仇爵軍餉銀一千兩如果原未收受顯是

本官破冒徑自叅提及查阿堂男阿哲實年幾歲應該作何安置一併勘處停當作速具奏以憑覆請定奪嘉靖四十年五月十四日題奉

聖旨是欽此

覆監察御史唐繼祿條陳修邊詰戎疏

題為仰體

聖心陳末議以修人事以隆天眷事職方清吏司察呈

奉本部送戶科抄出廣東道監察御史唐繼祿題奉

聖旨該部看了來說欽此欽遵抄出送司察呈到部着符

廣東道監察御史唐繼祿條陳修邊防詰戎兵二事

均於安攘有益合就開立前件議擬上請定奪嘉
四十年五月十五日題奉

聖旨依擬行欽此

一此年黠虜恣肆看得各邊墩堡以之傳報烽燧則
為我之耳目以之收斂人畜則為我之屏翰關係甚
重節經邊臣建言本部覆議責成督撫等官乘時脩
繕其說已詳但或因錢糧不敷而力不能為或因虛
騎充斥而勢不可為或因委官不才而不知所為圯
壞之事往往有之內地妖逆從而為虜嚮導避堅攻
瑕避實擊虛邊報孔棘坐此故耳御史唐繼祿言及

於此無非先於自治之義合無備行各處總督鎮巡衙門督同守巡兵備及各該將領備查境內墩堡堪守若干損壞若干已經具奏者併工脩築未經具奏者一面勘議一面先行脩築務在秋防之前逐一完固以為永逸之計果有前項奸狡之徒是乃亂臣賊子人人得而誅之即便具實奏聞明正其罪但須審鞫允當不可濫及無辜反傷和氣

一詰戎所以戒不虞者得

國家養兵本以衛民非以病民南中軍士素稱脆弱往因倭奴之擾見其不足為恃始為召募之舉遂使無

賴惡少得以竄名其間官司失於制御漸成驕悍即如南京蘇州福建各營之兵是已不能禦寇反為內寇不能宣威反損

國威言之可恨給事中魏元吉先嘗言之已蒙

聖明俯納其議嚴旨申飭御史唐繼祿今又言之無非振肅綱維之意合無通行南京兵部并各該督撫等官務要仰體宸衷大伸軍法以後各軍果能奮忠效義者豐其糧賞卹其勤勞以盡憫下之仁若使不知省改仍前恃逆輕則治以軍法重則查照本部原議改調邊衛甚則宜諸重典以示懲戒

覆浙直總督尚書胡宗憲等三省夾勦山寇疏

一題為乞行勦除山寇巢穴以靖地方事職方清吏司案
呈奉本部送兵科抄出總督浙直福建等處軍務兼
巡撫浙江地方太子太保兵部尚書兼都察院右都
御史胡宗憲提督軍務兼巡撫福建等處地方都察
院右副都御史劉燾題俱奉

聖旨兵部知道欽此欽遵抄出送司案呈到部看得總督
浙直福建尚書胡宗憲巡撫福建都御史劉燾奏
稱廣東饒平縣賊首張璉等大埔縣賊首蕭雪
程鄉縣賊首林朝曦等糾衆侵越汀漳二府各

方四散劫掠日久各賊巢穴在於廣東必須絕其盜源禍患可息一節為照前項賊徒往來福廣境上兵至則遯入巢穴兵退則復肆剽掠作患日久地方漸不能堪必須各該督撫等官不分彼此叶心勦捕事方有濟合候

命下移咨總督浙直尚書胡宗憲提督兩廣侍郎鄭繼總兵官陳王謨巡撫南贛都御史楊伊志巡撫福建都御史劉燾從長計議嚴督叅將并該道守巡兵備守備等官選調精兵應該搗其巢穴者多方搜勦使之入無所據應該防其攻劫者隨處奮擊使之出無所

獲務絕禍端以安黎庶本部一面轉行巡按廣東福建江西各監察御史通候事寧之日將獲功失事人員分別等第造冊具奏如再行玩愒養奸蓄寇先行從實叅究以憑覆請定奪嘉靖四十年五月二十五日題奉

聖旨是欽此

覆南京科道官楊銓等論叅替尚書江東別用疏題為營軍大肆狂悖毆傷職官乞

賜亟黜愴謬本兵大臣併懲營軍首惡以肅兵紀以安地方事職方清吏司案呈奉本部送兵科抄出南京兵

科等科署科事南小吏科給事中楊銓等奏又該南
京浙江等道監察御史劉行素等奏為營軍聚眾
傷職官乞 賜亟斥庸昏本兵大臣早選才望以鎮
肅人心以安根本重地事俱奉

聖旨兵部看了來說欽此又該南京兵部等衙門太子少
保尚書等官江東等題為地方事奉

聖旨兵部知道欽此欽遵通抄送司案呈到部看得南京
兵科等科署科事吏科給事中楊銓等南京浙江等
道監察御史劉行素等南京兵部等衙門尚書等官
江東等各題奏前因大率謂池河新營兵變細打千

戶吳欽皆由本兵申革幫丁所致在楊銓劉行素等則稱尚書江東威令不行輕信妄為查革幫丁貽禍地方乞要亟賜罷黜惟復取回別用及要將倡亂首惡依律治罪并行當事諸臣欽承威

命在江東等則稱千戶吳欽申革幫丁該司方議清理尚未呈堂各軍輒行凌辱職官法委難容及揭開搶獲首惡九名并將千戶吳欽把總余忠等查叅前來各一節為照池河地方去南京二百餘里飛熊英武廣武三衛雖隸南京自來開設江北原與振武管兵不相干涉乃今不畏法紀聚眾吶喊細打職官搶劫

貨已成不道之喜豈止無將之戒雖稱拿獲九人中
間不無漏網當此人情縱肆之時必須重懲難以輕
貸尚書江東始因議革供丁責固難諉終能計擒首
惡情似可原但叅贊重臣全在威望而才識猶似次
之既經言官極口論列損威傷重以後自難展布相
應與事內各官通行議擬題請合候

命下移咨吏部將江東取回別用員缺先行推補把總余
忠衛總吳大有倭俊高堂中軍楊鉞百戶仲瑤俱革
去見任不許管軍管事一面將見獲犯人邢思劉奉
趙亮熊爵用住兒史均減秀欽英胡堂并千戶吳欽

通送南京法司審究明白問擬具奏一面備行內外
守備等官魏國公徐鵬舉等坐委都督吳瑛劉顯坐
營官張光大再查前項首惡果有遺漏徑自拿送法
司一併究治其餘脅從之人始從寬假各軍供丁照
舊幫貼既不許輕易查革嚴急以失衆心亦不許聽
從影射姑息以傷政體仍出給簡易告示明諭知之
嘉靖四十年五月二十五日題奉

聖旨是江東着回籍聽候別用員缺吏部便會推堪任的
來着欽此

覆巡視京營御史張九功條陳捕盜卹軍疏

題為仰遵

明旨敷陳時弊以回天意以隆聖化事職方清吏司文
呈奉本部送兵科抄出巡視京營河南道監察御史
張九功題奉

聖旨該部知道欽此欽遵抄出送司案呈到部看得河南
道監察御史張九功所陳平盜賊以安地方委於弭
盜有益恤營軍以蓄國威又經戎政大臣查議相
同合就開立前件議擬上請定奪嘉靖四十年閏五
月初二日題奉

聖旨依擬行欽此

一平盜賊以安地方看得荒年多盜勢所必至仰蒙
皇上屢勤 聖諭勅下臣等責令所在官司撫戢擒捕

神謀聖弄仁義並施一時臣工奉行惟謹今據山西沁州

定襄等處有賊聚衆數百戕殺千戶淫虜婦女失事

不為不重彼處守臣不見奏報萬一釀成大寇勞費

不貲巡視御史張九功舉以為言無非除暴安民之

計合無依其所擬一面備行山西巡撫官量調官兵

刻期搜勦不許玩寇以致滋漫巡按御史先將應參

應問人員作速查明星馳回奏本部一面通行各處

撫按官但有草寇生發務要設法擒捕仍具由奏知

如敢效尤山西隱匿不報聽臣等與該科指名叅究
一恤營軍以蓄國威看得京營患病官軍幾至二
千餘名呻吟就斃誠可矜憫巡視御史張九功舉以
為言誠足以廣我

皇上軫念元元之仁既經戎政大臣查議前來合無依其
所擬先於支出太僕寺脩置金鼓旗幟等項子粒銀
二千五百兩定委副將等官再加查審作速動支每
軍一名給銀三錢每官一員給銀五錢以濟貧病銀
果不敷容臣等徑自另行處給其官軍雖病家道殷
富自能處辦藥餌者不許一槩混支事元之日造冊

送部查考

覆南京都督劉顯量帶親兵隨營操練疏

題為懇乞 天恩假權宜宣國威以安根本事職方清
吏司案呈奉本部送兵科抄出協守浙直地方副總
兵官署都指揮僉事劉顯奏奉

聖旨兵部知道欽此欽遵抄出送司案呈到部看得協守
浙直副總兵劉顯奏稱陞授南京中軍都督府提督
振武營乞要帶領川兵二千名隨營同軍操練一節
為照兵將固貴相識兵食尤當早計都督劉顯素與
川兵上下服習真行以臂使指之義若使帶入南都

隨營操練內外緩急均為有益但彼中原無前項兵糧以後供饋不繼未免反致失所作事謀始相應從宜議擬合候

命下移咨南京兵部轉行都督劉顯將原領川兵聽其揀選五百名帶赴該營同軍操練應得糧餉照例支給其餘一千五百名盡數交與新任副總兵楊尚英統領戰守仍聽劉顯便宜從事徑自調用嘉靖四十年閏五月十二日題奉

聖旨是欽此

覆左給事中張益等增定叅贊尚書職掌疏

題為乞 賜酌處事宜以固留都根本事職方清吏司
案呈奉本部送兵科抄出兵科署科事左給事中張
益等題奉

聖旨兵部看了來說欽此欽遵抄出送司卷查先該本部
議題節奉

聖旨張鏊且着戴罪辦事與同李遂撫安軍民凡事許便
宜處置欽此欽遵今該前因查呈到部看得兵科署科
事左給事中張益等題繙南京兵部尚書叅贊機務
一遇警急則皆略守備而叅贊不可不重其職掌
乞要從長議擬於叅贊 初內事體不便者稍為更

易舊日所無者稍為增入各一節為照南京兵部尚書職在叅贊與內外守備均有保釐之責原奉

勅諭開載已明頃因地方多事督責之議全在叅贊若不重其事權其勢自難展布該科欲要從長議擬委為得其領要查得各處多有因事增

勅事例相應斟酌題請合候

奉下備咨南京兵部轉行南京五府僉書都督既分管振武神機大小教場以後俱聽叅贊節制應天淮揚巡撫都御史凡事與叅贊叶同計議而行副總兵叅遊兵備等官俱聽叅贊委用未盡事宜悉聽叅贊便

宜處置本部仍將前項職掌行移 內府翰林院除
原 勅照舊外另請 勅諭一道給付新任尚書李
遂欽遵行事平寧之日徑自奏繳嘉靖四十年閏五
月十五日題奉

聖旨依議行欽此

議起用閑住公侯伯使過疏

題為急缺勲戚推用事武選清吏司案呈照得南京左
府右府缺掌印官又缺操江武臣北京五府僉書官
左府右府各缺一員前府缺二員例該於公侯伯內
准用查得勲戚餘內通無相應者呈乞查處案呈到

部有得兩京五府掌印僉書南京守備操江兩廣總
廣總兵舊例俱於公侯伯內推用緣各爵人數亦少
兼之未任者則少不更事不堪推舉已任者則多被
論劾不應推舉該司既稱乏人委當酌議題請合候
命下容臣等於革任公侯伯內查有因公罷關原與行檢
無碍者各另疏名請

旨簡用令其洗心策勵以蓋前愆以收後效其坐府僉書
照舊將資深都督相兼推用本部一面通行兩京科
道官速查各爵果有才能卓異堪以大用者會本旌
薦附簿聽候庶幾公論有歸人思感奮于城腹心之

臣自當以漸而出矣嘉靖四十年閏五月二十日題
奉

聖旨是欽此

嚴查延綏鎮城饑民倡亂疏

題為鼎省赴食饑民乘夜搶奪財物米糧當遣官兵即時追捕肆散以安地方事職方清吏司案呈奉本部送准巡撫延綏等處地方都察院右僉都御史孫慎鎮守延綏總兵官孫勇揭帖通送到司案呈到部看得延綏鎮城閏五月十九日昏夜劫掠之變雖稱四外流食之人乘機搶奪豈無一二土著叅與其間彼

時止有總兵官孫勇都御史孫慎差人禁緝其副總
兵張琮遊擊時達范國輔陳力同處一城緣何杜門
坐視不行擒捕顯有避難縱惡之跡全無竭忠任事
之義罪狀昭彰難以輕貸乃今歸咎於巡捕之官聊
以塞責殊失法典係干地方相應通行議擬合候
命下移咨總督都御史程軌巡撫都御史孫慎公同總兵
官孫勇務將倡禍首惡搜訪賊私下落追究明實從
重問擬會同具奏其餘脅從之人出給簡明告示姑
從寬假中間雖係首惡有能連姓出首者亦准開釋
不必深究一面移咨都察院轉行陝西巡按御史速

查前事是否饑民乘夜搶掠有無別項大奸巨惡隱蔽不舉張琮時達范國輔陳力先行住俸立限擒賊通候事完或有罪無功或有功無罪或功罪相準從實回奏務使將官欺慢者無以苟容奸兇恣縱者重以為戒方見振飭綱維脩明國體之意其鎮巡標下官并都司衛所等官孫慎孫勇仍要嚴加查究當夜何官見在公所協心擒賊何官不在公所忍心自保應軍法處置者重加懲治庶然奏者指名叅奏嘉靖四十年六月十五日題奉

聖旨是欽此

覆給事中徐鼎條陳海防疏

題為罄愚衷陳末議以裨東南大計事職方清吏司案呈奉本部送兵科抄出禮科給事中徐鼎題奉

聖旨該部知道欽此欽遵抄出送司案呈到部看得禮科給事中徐鼎條陳四事均於東海戎政有益合就開立前件議擬上請定奪嘉靖四十年六月十五日題奉

聖旨依擬行欽此

一練上著看得土著之兵人情地形素所服習故能以主待客以逸待勞比之遠調客兵利害懸絕節經

言官建白本部議覆其成當事諸臣加意團練奉有
俞且其說已詳查與給事中徐鼎所言大略相同合無依
其所擬備行各該總督鎮巡衙門督同守巡兵備叅
遊守把及軍衛有司等官各將所轄水陸之兵不拘
召募逐一簡選精銳沙汰老弱及時操練務使人人
可用不致空費糧賞本部一面移咨都察院轉行各
該巡按御史巡歷所至即查彼處土兵曾否教練有
成效者具實旌薦因循誤事者指名叅奏其選募一
節不知原題何項銀兩見在何處收貯悉聽各官從
自酌量施行

一明職守者得職守定則敢有責成信地明則人
推諉即今閩廣山海寇盜並騫交馳為患不輕南
兩廣軍門互相推調以致賊勢日熾寔因職守不明
之故給事中徐詒舉以為言切中其病合無依其所
擬備行福建兩廣南贛各都御史各照原擬責任及
所轄地方嚴督海道兵備守巡察將府縣等官務將
前項盜賊多方勦捕刻期盡絕如若仍前推託殃民
玩寇容臣等并該科從重叅究

一核功罪者得激勸人心因在賞罰之當嚴明賞罰
全據功罪之實地方官員失事則掩千以為百獲功

則以一而為十斬獲至多臨陣甚少給事中徐鼎舉以為言不止閩廣是誠沿邊沿海積習之弊合無依其所擬備行總督提督軍門嚴行兵備將領等官今後地方失事及斬獲首級一應有功有罪人員務要從實開報本部覆行巡按御史逐一覈勘如敢蹈習舊弊隱罪張功有重賞罰聽本部與該科從實叅奏一赦逋逃看得沿海小民迫於饑寒相聚為盜實非本心若不開其自新之路則黨類日繁為患愈甚竊中徐鼎舉以為言無非弭盜安民之計合無依其所擬備行各該總督撫按衙門除大奸巨惡律法嚴

容者自有常刑外其餘脅從之徒悉聽從宜招撫令
其歸還復業仍出給簡明告示各許自首免罪不許
互相告訐至於與販魚鹽變項生理不在禁例者不
得一槩阻塞

覆宣大總督都御史李文進等李在屬夷功賞疏
題為仰仗 天威撫處屬夷勦除衆虜納款效順事職
方清吏司案呈奉本部送兵科抄出總督宣大山西
等處地方軍務兼理糧餉都察院右副都御史李文
進巡撫宣府等處地方替理軍務都察院右僉都御
史遲鳳翔題俱奉

聖旨該部知道欽此欽遵抄出送司察呈到部看得總督
宣大山西軍務都御史李文進巡撫宣府都御史遲
鳳翔各題稱屬夷史氏兄弟斬獲虜首一十餘人黨
類百有餘衆及稱叅將呂淵原任叅將周一元守備
高鄉原任守備韓尚忠撫夷官劉潤均當將管屬夷
史大史二桃花帶等賞當從厚乞要將呂淵等量賞
各該屬夷分別厚賚史大史二量請職銜令其管不
諸夷各一節除職銜不敢輕議外為照屬夷史大等
邇年以來雖聽招撫乍叛乍臣不足為恃乃今苦虜
侵暴一旦翻然改圖互相讐殺忠順之心雖云難保

其終效用之跡似當即與其進叅守等官呂淵等往來撫處均有微勞既該督撫官李文進等會題前來事干夷情相應通行議擬合候

命下將吏大照依都督影克事例給賞織金紵絲衣一套綵段二表裏史二給賞綵段二表裏仍與桃花帶等并呂淵周一元高卿韓尚忠劉潤聽李文進遲鳳翔動支官銀從重獎勞在夷人務使極其歡感以堅圖報之心在將領務要甄別公平以絕觖望之念一面宣諭史大等仰戴

聖恩以後鈴東部落永為藩籬不許陽順陰逆自干

天譴嘉靖四十年六月二十一日題奉

聖旨是史大賞織金紵絲表一套綵段二表裏史二綵段
二表裏仍與桃花帶等并呂淵等獎勞欽此

覆江福等處撫按官奏報賊情責限協力勦平疏
題為地方賊情事職方清吏司案呈奉本部送兵科抄
出巡撫江西等處地方都察院右副都御史張元冲
題奉

聖旨兵部看了來說欽此又該巡按福建監察御史李廷
龍題為續報地方賊情事提督軍務兼巡撫福建等
處地方都察院右副都御史劉燾題為飛報山寇流

突地方事俱奉

聖旨該部知道欽此欽遵通抄選司卷查先該巡撫福建
都御史劉燾題稱賊首張璉蕭雪峰等流犯汀漳地
方原係南贛軍門專責該本部議行南贛兩廣軍門
查照原擬責任多方搜勦又該巡按御史李廷龍題
稱福興漳泉殘倭未除延建汀邵山賊盤據乞要申
勅都御史劉燾會同南贛都御史楊伊志互相應援該本
部議行福建南贛各都御史併力勦捕限九月以裏
務期盡絕又該禮科給事中徐鼎條陳一款明職守
內稱福建海寇未靖則責福建軍門及巡視海道如

饒平山寇未除則責兩廣汀贛軍門及分巡漳南嶺東二道又該本部議行福建南贛兩廣都御史各照所轄地方勦捕俱經節奉

欽依通行欽遵去後今該前因通查案呈到部看得巡撫江西都御史張元冲等具題前因大率皆謂閩廣之賊在張元冲則稱賊由寧化光澤等處窺越新城廣昌從汀漳寧都等處覬攻萬安泰和欲行福建南贛軍門協策艾治如驅近江西地方行臣會同夾擊在福建巡按御史李廷龍則稱建寧以外無處無賊在巡撫都御史劉燾則稱各賊多係年凶乏食相率竄

掠府縣從宜招撫勢必解散各一節臣等逐一參詳
張元冲所論正因閩廣之賊突入江西境內恐其醜
類嘯聚連結未已意欲早為驅除以絕堅冰之漸至
於福建之事則患在剝膚汀漳興泉盡為豺虎之穴
巡撫之言似猶未盡巡按之言則因事直陳明白痛
切所據巡撫都御史劉燾提督都御史楊伊志玩愒
之咎均屬難辭若不嚴加究處三省生靈未無安枕
之期相應通行議擬合候

命下將劉燾照舊住俸楊伊志住俸戴罪本部馬上齋文
交與劉燾楊伊志并兩廣提督侍郎張臬總兵官陳

王謨江西巡撫都御史張元冲各照原擬責任及所轄地方矢心協力督率叅遊守巡兵備等官選調勤兵分投勦捕廣東則當絕其源福建則當塞其流江西則當遏其波照依近奉

欽依通限九月以裏平寧面奏一面轉行福建廣東江西巡按御史各要隨軍紀驗不許轉委別官事寧之日通將失事獲功人員覈實具奏一面移咨總督浙直福建尚書胡宗憲酌量賊勢急緩或應指授方略或應發兵應援事在閩外徑自便宜施行嘉靖四十年七月初三日題奉

聖旨是道賊寇猖獗三省地方受害甚慘各官不行用心設法勦平好生怠玩且都着戴罪供職殺賊限九月內奏報寧息如再悞事各該巡按御史指名從實叅奏重治欽此

覆江西巡按御史段顧言等飛報賊情協勦疏題為盜賊猖獗陣亡方面等官伏乞

聖明褒錄忠勇嚴處督撫諸臣併速議調兵會勦以靖地方大患事職方清吏司案呈奉本部送兵科抄出巡按江西監察御史段顧言題奉

聖旨兵部便看了來說欽此又該巡按福建監察御史李

廷龍題為再報地方賊情事奉

聖旨該部知道欽此案照先該巡按江西監察御史段願言巡撫江西等處地方都察院右副都御史張元冲題為緊急賊情事俱奉

聖旨兵部便看了來說欽此欽遵通抄到部送司查得正德七年七月內該總制江西等處地方軍務左都御史陳全等題為緊急賊情事內稱江西按察司副使周憲領兵在華林山殺賊三十餘人被賊殺死伊男周幹隨父身死通判汪頴被傷猶戰俱宜褒錄及衆稱都指揮胡王衆議沈煉等失事緣由該本部覆議

得副使周憲亡身殉國忠節可嘉伊男周幹隨
傷死孝義可取委宜褒錄通判汪頴面被鎗傷力
却賊亦可嘉獎被殺兵使人等合行原籍官司恤其
家屬免其差徭被傷者仍各給與湯藥都指揮胡玉
叅議沈煉副總兵張勇及三司掌印領兵官俱各有
罪總制都御史陳金鎮守太監黎安巡按紀功御史
江萬寶曾倣亦難辭責奉

武宗皇帝聖旨是周憲亡身死難周幹赴闕被害父死于
忠子死于孝情俱可憫周憲贈本司按察使與他謚并
祭葬還廩一子做百戶世襲周幹孝烈着有司旌表門

間汪頴面已被傷猶能力戰陞二級其餘陣亡征傷兵
便人等都依擬優卹務使各沾實惠胡王等畏懼退縮
不行策應依擬提問着戴罪殺賊事寧之日分別功罪
明白奏來定奪張勇及三司掌印領兵官都住了俸并
鎮巡官着陳金上緊督率用心滅賊以圖後效本處有
交通賊犯挑送鹽米上寨的務要根究得獲照依近日
直隸地方王欽等通賊事例凌遲處死决不輕貸欽此
查呈到部看得巡按江西御史段顧言題稱閩廣山
賊流犯江西太和永豐等處副使汪一中指揮王應
鵬千戶陳策唐鼎陣亡事王應時被執叅稱提督

南贛都御史楊伊志玩寇殃民罪當首論江西巡撫
都御史張元冲貽害縱奸法當并論分守南贛叅將
谷暘按兵引避所當拿問建撫守備李寧積玩成風
亦當重處乞要將前項各官分別查處并將兩廣福
建各軍門追究致寇之由縱寇之罪江西巡撫加添
提督軍務職銜請給旗牌陣亡副使汪一中立祠贈
官仍廕其後指揮王應鵬等一體祀贈重傷僉事王
應時果得生還量加擢用又稱官軍調遣果能衝鋒
破敵即有損傷亦寬其罪如或按兵畏縮致殘地方
即非信地必重以罰其在軍門巡撫諸臣縱容姑息

即坐以玩寇之罪又該巡撫江西都御史張元冲題稱與巡按所言大略相同又該巡按福建御史李廷龍題稱賊將鎮海衛城攻破等情各一節為照前項賊徒大率出自廣東橫於福建加以贛州諸洞巨奸為之羽翼亡命惡少為之腹心乃敢肆無忌憚深入江西吉安等處抗敵官兵戕辱方面其勢已成乎堅冰其患非止於滋蔓在今日所最急者賞罰不可不明任用不可不當事權不可不重至於究本窮源廣東福建尤為基禍之首所據巡按御史段顧言李廷龍等具題前因敷陳明悉相應通行議擬合候

命下將副使汪一中照依先年副使周憲陣亡事例厚贈
一官賜給祭葬仍加世廕僉事王應時斟酌通判汪
頴被傷事例量與文廕移咨吏部不次擢用指揮王
應鵬千戶唐鼎陳采行令該衛所將應襲兒男保送
赴部各襲陞二級仍先處給官殮銀三十兩給驛回
籍安葬其餘獲功失事陣亡應優卹者從重優卹應
覈實者作速具奏其江西各該守巡兵備都司掌印
僉書府縣衛并廣東福建惠潮汀漳建邵等處兵備
守巡守備等官通行住俸戴罪仍於江西添設僉書
都司一員聽候委用領兵本部一面馬上差人齎文

交與兩廣福建江西南贛各該督撫侍郎都御史調
集勁兵併力夾攻遵依 欽限務在九月以裏勦除
盡絕以靖地方敢有互相推調者即便從重叅究江
西巡撫都御史暫加贊理軍務職銜換給

勅書請給旗牌欽遵行事福建江西廣東巡按御史各請
勅一道照依題准事理隨軍紀功不許轉委別官一面備
行總督浙直福建尚書胡宗憲總督江西軍務或應
設法拒堵或應發兵應接悉聽相機處置仍請

勅一道增擬職任事寧之日通行照舊其地方土人有能
擒斬賊級者與官軍一體陞賞獲賊待物盡數給

本人官司不許侵扣中間果有豪傑力能號召多人
報効者聽巡撫官加以頭目名色以便錄用官軍以
後衝鋒破敵者雖有損傷亦免治罪畏縮觀望者即
非信地重加究罰悉照北方規格施行及照提督南
贛都御史楊伊志御史段顧言則欲首論巡撫江西
都御史張元冲御史段顧言則欲併論巡撫福建都
御史劉燾御史段顧言則欲追論雖失事情狀不同
均為有罪內劉燾姜簡兵略年力方剛楊伊志徒持
清謹振勵無望張元冲則在二臣之間合無將楊伊
志革任聽勘員缺會官推補劉燾張元冲一體住俸

抄襲卷之五
戴罪以責後效將谷暘守備李寧玩寇殃民罪惡
深重委當拿解來京從重治罪嘉靖四十年七月初
七日題奉

聖旨這各官失事揚伊志革任回籍聽勘員缺便推補張
元冲住了俸劉燾先已住俸且姑留用都著戴罪殺賊
江西都司革俸贛吉撫建惠潮汀漳建邵十府凡賊經
由併入犯之處守巡兵備守備府縣衛所官等都住了
俸吏兵二部便查各官職名開具奏來通候賊平之日
分別奏請定奪谷暘李寧巡按御史拿解來京問張元
諭楊應東陽冲劉良翰丁鑑巡撫衙門提問具奏各缺

先補胡宗憲着兼節制江西地方相機發兵應援江西
巡撫暫加兼理軍務都需勅與他其餘准議行汪一中
死事可愷贈光祿寺卿廕一子與做錦衣衛百戶還與
他祭葬立祠王應鵬唐鼎陳策贈官陞襲照例行王應
時陞二級用欽此

覆宣大巡按御史董學等論大同出塞功罪疏
題為貪肆邊將失律喪師懇乞

聖明重加究治以昭法紀以安邊疆事職方清吏司案呈
奉本部選兵科抄出巡按直隸監察御史董學題又
該總督宣大山西等處地方軍務兼理糧餉都察院

右副都御史李文進巡撫大同地方督理軍務都察院右僉都御史楊選題為官軍出塞勦捕叛逆生擒斬獲事俱奉

聖旨兵部知道欽此隨該兵科叅看得巡撫都御史楊選會同鎮守大同總兵官都督僉事劉漢題為官軍出塞勦捕叛逆生擒斬獲事一節為照李從陽等係漢人思家投降趙大賢等捉鎖而歸與擒獲虜賊不同安得分首從論功板升之事亦為倉皇失計所損已多中間不無支吾况動調官軍一千五百員名所獲叛丁一十二名口斬首四顆陣亡官軍一十六員名

水滄死家丁一十九名在陣射死官馬四十二匹滄
死馬三十六匹則功不掩過得不償失矣合行抄出
議處施行等因通抄送司案呈到部着得巡按直隸
監察御史董學恭稱大同總兵官劉漢輕率寡謀邀
功塞外聞衆虜之追而坐失應援取板升之敗而昭
著莫掩巡撫楊選職叨替理而任武夫之貪肆總督
李文進任專督率而恣將領之自專乞要將劉漢亟
為罷斥或重加罰治李文進等量加戒飭又該總督
撫鎮等官右副都御史李文進等各題稱官軍出邊
至豐州大小板升等處渡河搗巢共擒斬二十四名

口穎陣亡官軍譚道等一十六員名淪死官軍擺言
等一十九員名射死官馬四十二匹淪死三十六匹
被傷官軍一十五員名乞要照例陞賞優卹生擒真
虜叛逆家屬行巡按御史勘明具奏及該兵科叅出
議處各一節為照蠡茲醜虜始因逆賊丘富勾引為
害已久近又加以老營堡叛丁同惡相濟羽翼益繁
乘時搗巢以挫其勢近歲節奉

明旨不為過舉但兵家之事貴於萬全出塞之危全賴一
將乃今總兵官劉漢始而人謀不戒擁重兵以觀望
繼而天時未順致半渡之淪傷雖有斬獲之微功

免喪失之重咎所據巡按御史董學欲將本官罷黜
或重加罰治并兵科叅出前因無非振飭法紀之意
即日秋氣漸高正當臨敵之時相應與督撫二臣通
行議擬合候

命下將劉漢住俸戴罪稍候防秋畢日斟酌功罪另行計
處楊選李文進量加戒飭一面移咨總督李文進巡
撫陳其學務要嚴戒將領日後不得輕率邀功申飭
邊防日下猶恐中其報復一面移咨都察院轉行宣
大巡按御史將前項渡河擒斬首級并生擒真虜叛
逆家屬作速查驗中間投降之人與擒斬不同應否

錄功其滄沒官軍據督撫則稱不滿二十人據巡按則稱數百人人數懸絕務要逐一勘究歸一應叅應問人員從實分別具奏定奪嘉靖四十年七月十六日題奉

聖旨是劉漢住了俸戴罪殺賊楊選李文進著策勵供職欽此

覆巡撫陝西都御史裴紳省城添設叅將疏

題為添設將領專任責成以禦虜患事職方清吏司案呈奉本部送兵科抄出巡撫陝西等處地方都察院右僉都御史裴紳題奉

聖旨兵部知道欽此抄出送司案呈到部看得巡撫陝西
都御史裴紳題稱陝西省城止有都司無一將領軍
威不振乞要添設參將一員以備虜患一節為照陝
西會城自鎮守移住固原以來各該官軍既無專將
統領委難責成即今彼中虜情日增月益選將練兵
亟當計處所據都御史裴紳具題前因審時度勢委
非得已相應通行依擬合候

命下將陝西會省添設參將一員本部推選謀勇堪任者
上請

簡用就將見選西安左等四衛官軍與同巡撫標下馬軍

通共三千名交付統領無事專住省城如法訓練有
警專聽巡撫調遣截殺合用

勅書符驗旗牌等項照例請給嘉靖四十年八月十五日
題奉

聖旨是欽此

楊襄毅公本兵疏議卷六終